

zuzendariari

(0034) 943 300 222

OHARRA: Ahalik eta iritzi gehienek izan dezaten tokia, ez da komeni makinazko 15 lerro baino luzeago idaztea gutun hauetan. Idatzi duenaren izena, telefonoa, helbidea eta NAren zenbakia agertu beharko dira. Laburtu behar izanez gero, zuzendaritzak bere esku du horretarako eskubidea. Erdaraz iristen diren gutunak ez dira argitaratuko.



zuzendariari@egunkaria.com



Martin Ugalde kultur parkea 20140 Andoain

Ajuria Eneko atarian manifestatu zineten aktoreei

Belen Cruz (*Euskal Aktoreen Batasunaren izenean*)

Aski da! plataformak deituta joan den otsailaren 12an Ajuria Eneko atarian egin zenuten agerraldia dela eta, EABk (Euskal Aktoreen Batasuna) ondoko adierazpenen berri eman nahi dizue. EAB euren lana Euskadin eta Euskaditik egiten duten aktore gehienak biltzen dituen sindikatua da. Hori dela eta, EABk oso kontuan hartzen ditu gure gizartean dauden iritzi, sentimendu eta errealitate ezberdinak. Zilegi jotzen dugu ETArek aurka manifestatzea.

ETAk eraso egiten dio gizakiaren biziari, hil egiten ditu. Aktore izatea bizitza interpretatzea da, eta askotan kontrakoa egitea egokitzen bazaigu ere (dramak eta heriotza interpretatzea, alegia), bizitzeko eskubidea defendatzen dugu ukaezinezko ondasun gisa.

Egia da, halaber, ETAk pertsonen askatasunari erasotzen diela, baina askatasuna ukaezinezko eskubidea bada ere, hitzak berak Euskal Herrian dauden sentimendu ezberdinak adina interpretazio eta definizio ditu berekin.

Badago arazoa ETA dela uste duenik, gatazkaren kausa barik ETA ondorioa dela uste duenik. ETAk gatazka hori bizi-rik mantentzen laguntzen duela uste dute batzuek; beste batzuek, aldiz, Espai-

niako Gobernuaren estrategia piztu baino ez duela egiten, eta bada, halaber, bide politikorik ez egoteak ETArek jardura zilegi egiten duela uste duenik ere. Zaila da sentimendu horiek zein neurritan gertatzen diren zehaztea. Horretarako daude hauteskundeak, batzuei kosta egiten bazaie ere hori horrela dela onartzea.

Datozen hauteskundeetan zenbait aukera politiko mehatxupean eta beste hainbeste legez kanpo geratuko direla kontuan izanik, arduragabekeria da Euskadi gatazkan bizi dela ukatzea.

Guk, EABtik, aukera politiko guztien legezkotasuna defendatzen dugu, baina inozokeria eta maltzurkeria da Ajuria Eneko atarian manifestatu eta Eusko

Jaurlaritzari hilketa bat leporatzea Espainiako Gobernua erantzukizunetik aske utzita.

Gerraren aurka manifestatzeagatik gure lanbideak jasan behar izan duen kritika uholdea eta zaparrada mediatikoa ikusita, haren helburuekin bat ez etortzean boterea nolakoa den ulertuko zenuten ustea genuen. Hemen, zoritxarrez, ohituta gaude egoera horretara.

Errealitatea dirudien baino askoz ere konplexuagoa da.

Zuzenketa

Joan den ostiraleko EUSKALDUNON EGUNKARIKO *Iritzia* saileko *Hirusta* sailean oker joan zen sinadura, Itziar Madinaren izenaren ordez Edu Zelaietaren izena jarri genuelako. Barkamenak eskatzen dizkiegu aipatutako biei, eta baita irakurleei ere.

montxo



galdeiozu... ?



NAGORE ARANBURU

Aktorea

Zein da aktore gisa amesten duzun helburua?

Txomin Ugalde (Gasteiz)

Orain arte bezala lanean jarraitzeko aukera izatea, hainbat gauza probatzen. Eta jendea ez aspertzeari. Egunen baten gertatzen bada aldamenekoren batek abisatuko didala espero dut.

Otsailaren 18etik aurrera **Juantxo Lopez Uralde • Greenpeaceko Espainiako arduraduna** izango da Galdeiozu ataleko gonbidatua. Bidali zure galderak ordurako. galdeiozu@egunkaria.com

hirusta



Jon Benito

Elkarrizketa bat bakeaz eta gerraz

Aiztondon, gasolindegia bateko kafetegiarren barran eserita nago. Astelehen goiza da, lanera goiz jaiki behar diren drama igartzen da batzuen begietan. Gizon heldu bat dago nire ondoan. Atzerago, mahaia jazarrita, hegoalderantz doan eta penintsula zeharkatu nahi duen familia bat dago, Pasaia portura txartarra bila doazen kamioilari bi, eta beste jende bat, banaka jazarrita. Ondoan dudan gizonak egunkaria zabaltzen du aurrean. Egunkariari begiratzen diot zeharka. Argazkiek jaten dizkigute bioi begiak. Irudi horietako bat seinalatzen dit hantzez: «Ezagutzen duk?», esaten dit irribarrez. Ezetz esaten diot buruaz ezker-eskuin, ez dudala ezagutzen. Lastozko txapelaz eta sotana jantzita agertzen da argazkian, jendek inguratuta. Roger Etchegaray dela esaten dit, kardinal euskalduna. Bagdaden omen dago bakearen alde Aita Santuak duen kezka mundu osoari zabaltzeko.

Gero, askorik sakondu gabe aritu gara gerraz eta bakeaz. Gerrak gure bizia ezertan aldatuko zuen galdetu diot. Gure bizia gerrak aldatuko zuen, nahiz eta jakin gizakiaren aldaketarik sokenak ekarri dituela gerrak, bortxak. Bakearen abstraktutasunaz aritu gara. Arma fabriketan bakeaz zer pentsatzen duten, armadaburuek segurtasunaz zer iritzi duten, arinkeriaz, ardurarik gabe. Larunbateko manifestaldirako deialdiak entzun ditut irratian. Galde egin diot, behin larunbata pasa eta gero zer gertatuko zen, behin gerra hasita zer gertatuko den. Esan dit bakezale gehiegi dagoela eta bakegile gutxi. Bakeak zer esan nahi duen galdetu diot gero, zer dakien bakeaz. Ezer ez dakiela esan dit, galdetzeko Roger Etchegarayri, hemen ez dakigula gai horretaz ezer. Kanpoan behar duela bakeak, urrutia. Realak, oraindik, lehen postuan dela dio asteleheneko egunkariak.